



Dapi decennis sa chatta la sedia principala da la Banca Chantunala Grischuna a la Piazza da la Posta a Cuira.

FOTO NOSSAISTORGIA.CH/E. HUONDER

La banca dal chantun Grischun ha 150 onns

Ina cronica da spir midadas, adattaziuns, novaziuns e success

DA GIUSEP CAPAUL / FMR

■ **La Banca Chantunala Grischuna (BCG) po festivar quest onn il 150. anniversari. Ella fa quai cun ina rotscha da projects persistents ed ina cronica giubilara bain documentada e ritgmain illustrada.** Quella cumpiglia ils davos 25 onns (1995–2020) e mussa sin ca. 120 paginas ils pli impurtants eveniments e svilups che la BCG ha fatg atras dapi 1995. Era be in sguard lascha perscher las grondas midadas ed innovaziuns sa dadas. Bain la pli gronda saja la digitalisaziun ch'ha midà fundamentalmain ils basegns da la clientella. Mo la BCG è vegnida bain a frida cun bleras sfidas tras las dretgas disposiziuns e decisions prendidas en in ambient fitg cumpetitiv da la fiera.

D'ina banca da spargn ad in institut da finanzas modern

La cronica giubilara fa sortir co la BCG è sa sviluppada d'ina banca da spargn ed ipotecara ad in institut da finanzas modern. Ella è oz en il Grischun schizunt ina banca universal impurtanta per tut las gruppas da clients. Dapi sia fundaziun 1870 ha ella contribuì essenzialmain al svilup economic dal chantun. Sias participaziuns a la Privatbank Bellerive SA ed ad Albin Kistler SA a Turitg contribueschan oz a la diversificaziun dal retgav – in fatg ch'è sa pajà per la BCG.

Areguard la productivitat e rentabilitad tutga la BCG oz tar las meglras bancas da la Svizra. Questa valitaziun d'emprima classa cunferma era la surdada da la nota AA tras il rapport da rating da Standard & Poor's a la BCG. Al success han divers acturs contribuì, surtut la fideivladad da la populaziun dal Grischun e sias autoritads chantunales vers l'institut bancar giubilar.

Insaquants fatgs e datas da progress e success

Ina survista cronologica enserra fatgs e svilups che la fatschenta bancara ha fatg atras durant 150 onns. – 1871 è l'emprima agentura vegnida averta a Samedan, l'onn suenter er a Glion, Mustér, Scuol, Casti e Sta. Maria en Val Müstair. 1911 ha la BCG retratg ses nov edificzi central sin la Piazza da la Posta a Cuira. Avant sa chattava la sedia principala en la Chasa Grischa, la residenza da la regenza. – 1970 ha la BCG creà in fond giubilar sin ses 100 onns per promover cultura, perscrutaziun ed economia en il Grischun ed al dotà cun in milliun francs. – 2003 è vegnì fundà in fond da contribuziuns. La BCG metta onn per onn ca. dus milliuns francs – in pertschient dal gudogn – a disposiziun per sustegnair 450 projects da divers champs e sponsurescha pliras occurenzas.

1980 ha la BCG installà ses emprim bancomat. 1985 ha ella dà ora per l'emprima giada scrits da participaziun per laschar participar persunas privatas a la banca. Quai è stà in grond success. – 2008 vegn il Cussegl da la BCG depolitisà ed il dumber da commembers reducì dad 11 sin set. Davent dad alur elegia la regenza ils commembers dal cussegl da banca. Diesch onns pli tard entra *Ines Pöschel* sco emprima dunna en il Cussegl da la BCG.

2013 cuntanscha la BCG per l'emprima giada ina summa da bilantscha da 20 milliardas francs e 2019 surpasa ella en in semester la marca da 100 milliuns tar in gudogn dal concern. Lez onn sa retira *Alois Vinzens* – suenter 17 onns – sco CEO da la BCG. Cun *Martina Müller-Kamp* entra 2019 ina dunna per l'emprima giada en il directori da la BCG ch'ha quatter commembers.

Eveniments e svilups d'impurtanza

La cronica giubilara enumerescha blers eveniments e svilups impurtants durant las set epocas tranter 1995 e 2020. Mintga fasa ha purtà novas situaziuns, adattaziuns, midadas e sfidas. Visavi la posiziun e l'agir da la BCG sa mussa era mintgamai il svilup general en il chantun Grischun. Lez ha profità fitg da la banca giubilara, quai che suttastritga la gronda muntada da la banca da e per noss chantun insumma.

En las annexas èn anc inditgadas per il davos quart tschientaner: la cumposiziun da las autoritads bancaras, las statisticas da las fatschentas e la rait da las filialas davent da 1871 cun mintgamai las datas d'avertura, resp. da fermada. Ina lunga retscha.

Sguard en l'avegnir

Anc mai haja i dà – uschia pon ins leger en la cronica – tantas novaziuns tecnologicas cun in effect talmain radical sco ils ultims diesch onns. La midada digitala s'avanzia nunfranablmain e midia l'affar da banca, dals martgads, dals basegns e la moda co ch'i saja da lavurar. Incarica centrala restia la cussegliaziun persunala interumana da la clientella. Quest concept da servetschs è il model per il futur dal banking modern. La finamira reflecteschan er ils projects persistents dal giubileum davart ils temas: «aua/glatschers», «natira», «musica» ed «engaschi», cun ils quals la banca giubilara veglia metter accents per l'avegnir.

Sviluppadas vinavant vegnan era la visiun e la strategia da la BCG. «La basa persuerter resta» – tenor il CEO da la BCG, *Daniel Fust* – «la fidanza e l'attaschadadad dals Grischuns e da las Grischunas vers lur Banca.»